

四庫全書

子部

# 欽定四庫全書

子部

羣書考索續集卷五十四至五十六

詳校官中書

臣

寶汝翼

主事

臣

祁韻士覆勘

總校官知縣

臣

楊懋珩

校對官中書

臣

徐步雲

謄錄監生

臣

陳元熙

欽定四庫全書

羣書考索續集卷五十四

宋 章如愚 編

君道門

湯

處時之務當讀書而至於湯未嘗不悲湯之窮也雖然  
使湯安於其窮而不變不可也安而不變者是助桀者  
也放桀之罪身罪也助桀之罪心罪也身罪之罪其罪

小心罪之罪其罪大小不可以易乎大而身不可以掩  
乎其心也身罪而心非後世或可以原心而定罪身脫  
而心陷焉者吾不知其罪之如何也嗟乎此湯之本心  
也而難以告夫人吾觀當時曰舍穡曰其如台者非助  
桀之言也不急以伐桀者之言也夫安於虐而不急以  
伐焉者何也意者執於其分而不忍也夫不忍以賊乎  
其君而上之人誠忍焉湯之心又何如也吾固曰湯處  
時之窮者也

呂祖謙

德澤深教化明成湯伐桀而商之衆曰我后不恤我衆  
舍我穡事而割正夏觀此見得湯之德澤入於民者深  
教化示於民者明桀之民雖不聊生然商之民陶陶於  
農畝而不知非德澤之深者能如是乎桀雖無道而且  
以為正統之夏非教化之明而尊卑上下之分猶不忘  
乎此雖怨湯之言乃足以見湯之德澤教化也

應天順人

武王附

夫極聖人之常遇天人之變吾甘心

任之而不之謝非樂乎其命之革也彼不克嚴其不可

犯之尊往往自速其不可回之禍一或愬然乎天心之從違恬然乎人心之去就徘徊乎一事之不屑則我於至理已有乖戾安保天下之不呼舞四起而奪之亟吾不忍斯民或擠於不可救藥之時寧忍一己自冒其不可測知之勢德少慚乎吾身將大安乎天下樂未善乎一時將大聲於後世

劉穆元

六事自責桑林之禱乃其至誠惻怛之所形而六事以自責者又皆其反躬內省之實意然自常情觀之昭德

建中必無不節之政克寬克仁必無失職之民制事以  
義宮室何自而崇聲色不邇女謁何自而盛以至不殖  
貨利從諫弗拂而苞苴之行讒夫之昌必不能以累乎  
湯也然湯固無是也湯奚敢以無是而自足哉蓋其平  
日所以處其身者常歉如也嗚呼聖人之用心如此哉  
罪已湯之德莫如罪已以元牡告上帝者請桀之罪也  
有罪不敢赦者求已之罪也

范祖禹

救民

武王附

湯之伐桀討罪也升陟而不避險阻正

兵也與桀戰於鳴條危之也兵刃既接勝負未可知勝則出民於塗炭不勝則貿貿然將何所恃以歸乎危之固勝之也夫揖遜與賢而繼之以世又繼之以兵時愈交下視古愧焉而不辭天下之惡名以救斯民不避後世之口實以援斯世昔所未有自我為之雖時有汙隆而理無彼此因時乘理聖人之時中此湯之所甚懼而不釋然者雖後有聖人不幸而遇後世天下望其來蘇如旱雲時雨苟能不恤吾身起而應之舉一世塗炭之



民而置之清閭之地則湯之所甚懼而不釋然者至此  
可以無憾矣故曰于湯有光孟津之渡升陟之正也牧  
野之戰鳴條之危也數紂之罪若有涼德者武王之心  
又危於湯哉

陳君舉

具訓蒙士湯制官刑儆于有位所謂三風十愆惟曰具  
訓于蒙士而已此正易所謂蒙利用刑人意也

無心伐桀

文王附

書稱伊尹去亳適夏既醜有夏復

歸于亳蓋伊尹耕於莘野既以處士從湯矣及其適夏

非其私行也湯必與知之其君臣之心以為從湯伐桀以濟斯世不若使伊尹事桀以止其亂雖使夏不亡商不興無憾也及其不可復輔於是捨而歸爾其後文王事紂亦身為之三公至將囚而殺之然後棄之而西蓋湯之於桀文王之於紂其不欲遽奪之者如此此其所以為湯文王而後世之所不及也

蘇轍

因亳民以見忠厚之化湯之伐桀至於東征西怨南征北怨然亳民乃憚於興師必誓以必往而強其從者此

見湯之忠厚化於亳邑故其伐桀不惟湯有弔勉不得已之意而亳民亦至於強而後從非其本心樂為是舉非湯之盛德何以及此不然則安史之亂幽陵之民至以安史為聖惟恐其事事不濟豈至強而後從哉

盤庚

不與民爭勝盤庚遷都作書三篇而心腹腎腸披露於其末豈前此猶有懷未盡乎曰古人相告語法如此也人方以吾為厲已而遽與之別白是非若將好勝然者

是故撫諭慰釋以和其不平之心而未盡之意則徐待其定而後從

陳傳良

遷毫非強民盤庚之遷毫曰丕從厥志曰恭承民命蓋志者民之良心命者心之正理盤庚非從其情乃從其心也非順其事乃順其理也

民之忿心不可禁遏盤庚告諭爾衆則曰罔伏小人之攸箴自常情論之民不樂遷沮事之言惟恐聞之今乃使之無伏蓋民之忿心不當禁遏必使之發於語言乃

可以漸消殺如秦之誹謗者族民不敢言而忿怒之心日長矣況曰箴者盤庚之心豈以民言為悉不足聽舉事深恐下情壅塞蓋有旨也

呂祖謙

法令恩意並用盤庚曰無有逖適用罪伐厥死用德彰厥善盤庚責人以必遷之辭也又曰邦之臧惟汝眾邦之不臧惟予一人有佚罰盤庚自咎而不咎人之辭也上兩言法令也下兩言恩意也商君之徒有法令而無恩意盤庚則賞罰並用蓋無下兩言則徒法不能以自

行無上兩言則徒善不足以為政

君民相愛憂民之憂者民亦憂其憂盤庚罔不惟民之承則憂民之憂矣而保后胥慙是民亦憂其憂也

以貨飭臣非盛世事自盤庚有總於貨寶之戒至穆王之命伯冏復有惟貨其吉之戒成湯文武之隆未聞數數以貨飭其臣也噫其商周之衰乎

高宗

用傳說說草野一匹夫耳一旦應高宗之求幡然居相

位而不嫌高宗憑一夕之夢即倚說以重任而不疑何也堯帝不知舜方且觀其刑於二女而又歷試以諸艱之事以堯觀之高宗似失之畧以高宗觀之堯似失之過詳孔子曰參乎吾道一以貫之曾子曰唯顏淵問仁孔子曰克己復禮為仁顏子復請問其目曾子之以一唯悟道如高宗之以一夢信說顏子以問目求仁如堯之以歷試舉舜二者本無二體夏葛冬裘各宜其時堯之舉舜顏之問目可謂詳審曾子之唯高宗之夢可謂

捷徑蓋舜四岳所舉說高宗自得之顏子問仁曾子則夫子自告之其理不可不深思也

呂祖謙

用傳說不可以常論嘗惟傳說以匹夫而登相位不由薦舉不由人望不由家世不由勲業不由資序而當世物論遂信之而不疑何哉嗚呼此不可以常情論也有高宗有傳說則可君非高宗臣非傳說則必有私意用人而不合於公議者矣漢文帝以夢得鄧通光武以識用王梁此豈足信哉後世用人者當如堯帝試舜斯可



矣

周公所論者世臣周公作君奭之書曰在武丁時則有若甘盤高宗得一傳說而為商中興昭乎無以議為也而周公不取傳說而稱甘盤何耶蓋自古用人率由世選傳說雖足以當是責之重而世臣陵落已甚矣

至誠感天災異有二人君之過形見暴露然後出災異以警懼之此無道之君與天地隔絕不通飛潛動植皆失其宜如是者災異之應常遲賢君至誠與天地合為

一體情性之差少有過失災異立應如是者災異之應常連高宗祭成湯而有飛雉之變以高宗之為君豈其有異蓋高宗恭默思道夢帝賚予良弼精神與天地相通久矣又繼之以憲天之功德與天合故於祭祀之間畧有過厚飛雉隨而應之此雖高宗近厚之過過於厚亦過也

呂祖謙

夢得說高宗思得賢於夢寐故朕兆先見亦不忘於夢寐之間今有人誠心下卜有禱輒應此理之常譬如明

鏡物無不照亦非此往亦非彼來

程頤

周

農事開國周家以農事開國今觀七月之詩日月星辰之運行昆蟲草木之變化凡感乎耳目者皆有以觸其興作之思是其心無一念之不在乎農也自于耜而舉趾自播穀而滌場所用非一器所業非一端私事方畢而公宮之役毋敢稽歲功方成而嗣歲之圖不敢後是一歲之間無一日不專乎農也惟夫與婦惟婦與子各

共乃事各任乃役是一家之內无一人不力乎農也織  
薄於秋求桑於春躬耕蠶績之勞以為衣服之計無所  
不至猶恐其未足也于貉為裘又有以相之食爵及奠  
烹葵及菽脩菓蔬之美以克耆老之養無所不至猶恐  
其未足也獲稻為酒又有以介之當時農之所耕者自  
有之田而上之人又從而崇獎勸諭之故斯民亦以為  
生之樂而勤敏和悅之氣浹于上下不見其有勞苦怨  
歎之狀朋酒羔羊升堂稱壽君民相與獻酬忘其為尊

卑貴賤之殊 真德秀

民心念周拯救於文武涵養於成康勞來安集於宣王  
卒之民心固結牢不可解黍離之歌涕泗欷歔葵丘之  
會感激奮發此猶可也至於末年以盟向予鄭而盟向  
之民不肯事鄭以陽樊予晉而陽樊之民不肯事晉是  
知民心之不忍棄周雖衰微之後猶一日也

享國長久昔周之興也禮以為本仁以為源自后稷以  
來至於文武成康其講禮也脩矣其施仁也深矣民習

於耳目決於骨髓雖後世微弱其民將有陵慢之志則  
畏先王之禮而不敢為將有離散之心則思先王之仁  
而不忍去此其所以享國長久也

司馬光

文武待臣之至鹿鳴之詩曰燕羣臣嘉賓是以臣為賓  
也伐木之詩曰燕朋友故舊是以臣為友也以臣為賓  
敬已至矣以臣為友敬益至焉故序詩者謂雖天子必  
須友以成得其指矣玩其詩止見其為人之求友而不  
見為君之求臣蓋先王樂道忘勢但知有朋友相須之

義而不見有君臣相臨之分故也詩凡三章皆言燕樂之義三章曰既有肥羜以速諸父又曰既有肥牡以速諸舅諸父者朋友之同姓而尊者也諸舅者朋友之異姓而尊者也三章曰籩豆有饒兄弟無遠兄弟者朋友之同儕者也夫以天子之貴而尊其友曰父曰舅親其友曰弟曰兄此其為尊德樂道之至也夫此其所以為有周之盛也夫

真德秀

日夜整齊其民周之制民有罪惡未麗於法而害於州

里者桎梏而坐諸嘉石重罪役之暮以次輕之其下罪三月役使州里任之然後宥而捨之其化之不從威之不格患苦其鄉之民而未入於五刑者謂之罷民凡罷民不使冠帶而加明刑任之以事而不齒於鄉黨由是觀之則周之盛時日夜整齊其民而鋤去其不善譬如獵人終日馳驅踐蹂於草茅之中搜索狐兔而搏之不待其自投羅網而後取也夫然小惡不容於鄉大惡不容於國禮樂之所易化而法禁之所易行者由此之故



也

不輕於用刑成周之時左右刑罰有五禁焉先後刑罰有五戒焉所以警民於未然之先者甚明也兩造之禁訟入束矢而後聽兩劑之禁獄入鈞金而後聽所以防民於將犯之際者甚著也至開其自新之塗篤其自反之念則嘉石之平圜土之教其施於已犯之後者尤切也刑乃所以教周之刑罰具見於周官大司徒以八刑糾民在三物教民之後而其所糾者不孝不睦不婣不第

不任不恤造言亂民而已是其刑祇以為教也

真德秀

周官不載學校之官周官三百六十而學校之官獨缺  
不載蓋以為統領於六官者皆法之所寓而學校非法  
守之職也

周官法度必有關雎麟趾之意而後可以行周官之法

度

程顥

用人無尊卑遠近嘗觀周公立政之書論文武得人之  
盛而至於夷微盧之烝三亳版之尹皆有常之士而其

選無異於三宅彼皆遠方也皆卑職也遠方非要地卑  
職非膴仕以天下之美材居之亦宜有所不安焉而莫  
之問何也有君如文武非棄材之主有臣如周公非蔽  
賢之相則遠之非踈之卑之非薄之也且夫周公大聖  
也天下所共知也而諸侯無伯則出為東伯六卿無宰  
則俯為冢宰畢公大賢也亦天下之所共知也而周公  
不沒則未得以為伯君陳不沒則未得以監商聖如周  
公而下缺人焉則降而為之不以為辱賢如畢公而上

有人焉則淹而留之不以爲恨天下不聖於周公而不  
賢於畢公者又何擇也

陳傅良

君臣相愛古者上下相親上之於下則曰駿發爾私終  
三十里惟恐民食之不給也下之於上則曰雨我公田  
遂及我私惟恐公田之不善也

籍兵觀成周籍民兵之數然後知古人之不誘乎名自  
司徒籍民數而言則治田爲八家可任者蓋二十人至  
於起徒役則毋過家一人耳自司馬籍兵數而言則一

甸六十四井蓋出七十五人至於行兵則又毋過三十人耳夫實調者如此其寡而虛籍如此其衆先王何自而不逃乎其名也兵之在民寧籍而不用

理財周官國用之制冢宰職之其權專也治財之官終其身而不易其位其任久也貢賦所入庫藏所出皆身親其勞府史胥徒無與焉其職勤也是三者天子言而附之所用之人不敢以苟簡倉卒而責辦也故成周之財國不告竭而民常有餘此其効爾

待士辟雍之於樂菁莪之樂育觀樂之一辭古人養士之意何其厚也以三物教萬民而賓興之觀賓之一辭古人取士之意又何其厚也

周禮春秋有功於周周自夷王已下寢衰寢微京師存乎位號而已然五六百年間綿綿延延不絕如綫而諸侯卒不敢叛周者周禮在故也王室益弱諸侯日強又二百年亂臣賊子如麻然而畏未敢取周者春秋作故也自堯舜三代唯周得八百有餘年雖后稷公劉積德

自遠實以二大典矣嗚乎周禮明王制春秋明王道可謂盡矣

天報其仁太王不耻於失國而耻於失民心忍於辱已而不忍於鬪其民避狄去邠而子孫有天下者七百餘年天報其仁也

范祖禹

### 文王

受命稱王為妄說書稱商始咎周以乘黎乘黎者西伯也西伯以征伐諸侯為職事其伐黎而勝也商人已疑

其難制而患之使西伯赫然見其不臣之狀與商並立而稱王如此十年商人反晏然不以為恠其父師老臣如祖伊微子之徒亦默默相與熟視而無一言此豈近於人情耶由是言之謂西伯受命稱王十年者妄說也以紂之雄猜暴虐嘗醢九侯而脯鄂侯矣西伯聞之竊歎遂執而囚之幾不免死至其叛已不臣而自王乃反優游而不問者十年此豈近於人情耶由是言之謂西伯受命稱王十年者妄說也孔子曰三分天下有其二



以服事商使西伯不稱臣而稱王安能服事商乎且謂西伯稱王起於何說而孔子之言萬世之信也由是言之謂西伯受命稱王十年者妄說也伯夷叔齊古之知義之士也方其遜國而去顧天下莫可歸聞西伯之賢共往歸之當是時紂雖無道天子也天子在上諸侯不稱臣而稱王是僭叛之國也然二子不以為非依之久而不去至武王伐紂始以為非而棄去彼二子者始顧天下莫可歸卒依僭叛之國而不去不非其父而非其

予此豈近於人情耶由是言之謂西伯受命稱王十年者妄說也

歐陽修

善處君臣之間不靳得民而民自歸之其勢可取而不取為商之民與為吾民何異臣人與為人臣亦何異故有君民之大德有事君之小心

謝顯道

視民如傷文王之視民如傷豈以冥冥之不可欺昭昭之不可犯哉幽明物我通為一體不見其有可傷之地

呂祖謙

挽人心以事商天下之生久矣尊卑之分不可易也而  
紂為之君夫紂誠君也文王誠臣也臣不可以加乎其  
君者理也而天下亦曰文王宜王夫文王固宜王也而  
文王之心則以為奚王也岐山之民王之民也江漢之  
民王之民也東海北海亦王之民也無王則無岐無江  
漢無東海北海而予奚得以君之也今岐之民則曰是  
文王之仁也江漢之民則曰是文王之化也東海北海  
則曰是文王之養老也嗟乎我何有於天下而天下過

知有我也已而虞芮不質成於商王而質成於我昆夷  
不遣聘於王而遣聘於我甚矣文王其無以謝天下也  
吾將有以率邠岐之民江漢之民東海北海之民與夫  
虞芮昆夷之聘而歸之王可也是故羑里之囚人皆以  
為文王之不幸也而文王則以為宜也我無以取信於  
君而得罪者宜也君奚過哉故易之書為明大分而作  
也自夫文王安於羑里之囚而不敢以過紂夷明養晦  
益堅事上之小心然後天下始曰文王聖人也聖如文

王而且不敢過我何有哉是以當時之人怨不至於叛  
憤不至於激者皆文王以身挽之也

呂祖謙

勞逸讀無逸見文王之勞讀立政見文王之逸

不自足羨里之囚若可憂也而從容於演易靈臺之成  
若可樂也而暇食之不遑太顛散宜生之徒若可用也  
而復以為無能往來茲迪彝教

以人道使人於采薇見先王以人道使人至於後世則

牛羊而已

范祖禹

涵養文王美里之囚死生憂患之至矣而從容演易安  
時處順無異凝旒端冕南面而居蓋其平昔涵養之功  
正在事物變遷之際與之循習無所駭異也

劉彥冲

為商室係民心汝墳之卒章曰魴魚賴尾王室如燬雖  
則如燬父母孔邇蓋勞苦之極從而寬之曰王室雖如  
燬而文王在邇有以恤我也玩此詩則民心雖怨乎紂  
而尚以周之故未至於泮散也是文王以盛德為商之  
方伯與商室係民心而維宗社者也其德可不謂至乎

張栻

教化王化之所振蕩德教之所鼓舞四方萬里如在掌  
握閭巷匹夫如游庠序當時鬼竄有好德之心武夫有  
干城之畧江漢游女無犯禮之思汝墳婦人有勉正之  
義共歌於詩班班可攷也

武王

非聖人之言失之過東坡謂武王非聖人斯言過矣故  
其所言竊武盡美矣未盡善也之論而不察孔子之意

蓋孔子止謂武王征伐不及舜之禪遜易曰湯武革命  
順乎天而應乎人詩曰武王有聖德故後世信孔子而  
不信東坡也既以武王非聖人而荀文若却言聖人之  
徒何哉

武未盡善是聲音之失說者以征伐不及揖遜曰迹固  
不及然其聲音節奏亦有未盡善者樂記曰有司失其  
傳也若非有司失其傳則武王之志荒矣孔子自衛反  
魯然後樂正雅頌各得其所是知未正之前不能無錯



者程顥

征伐非聖人所欲以言其德則韶武二樂皆盡美也蓋  
樂者德之華也以言其應世之事則武為未盡善蓋征  
伐非聖人之所欲也

周子先

舜與武王同道揖遜之事天與之人與之征伐之義順  
乎天而應乎人也聖人豈有二心哉如冬日則飲湯夏  
日則飲水事固如此征伐之義固不如儀鳳之容然聖  
人豈以我所遇之時不如舜而私自已哉盡善盡美聖

人之意豈不曰舜與武王同道

謝顯道

化天下昔武王既克商散財發粟使天下知其不貪禮  
下賢俊使天下知其不驕封先聖之後使天下知其仁  
誅飛廉惡來使天下知其勇如此則教化天下之實固  
已立矣天下聳然皆有忠信廉耻之心然後文之以禮  
樂教之以學校觀之以鄉射而謹之以冠昏喪祭民是  
以目擊而心諭安行而自得也

知天下之勢武王不泄邇不忘遠仁矣乎曰非仁也勢

也天下之勢猶一身一身之中手足病於外則腹心為之深思靜慮於內而求其病以療之二物腹心手足之相救非有待而後然故曰武王之不泄適不忘遠非仁也勢也勢如此其急而古之君獨武王為然者何也人皆知一身之勢而武王知天下之勢也

傾紂之否武王誓師之書必曰泰誓者乃否泰之泰紂時上下不交天下無邦武王大會諸侯以往伐傾紂之否故名篇以泰誓

王安石

憂無君天下不可一日無君也一日無君者周武王之  
憂亦伯夷之憂也武王憂今日之無君而伯夷憂後世  
之無君憂不同而君一也吾嘗讀秦誓之書未嘗不悲  
武王有無君之心也然武王之無君天下之有君也武  
王得無君之非而天下獲有君之幸以已之非而易天  
下之幸奚不可也而伯夷則不之恕也吾觀湯之慙未  
釋於伐夏之日而仲虺則釋之武自謂于湯有光而伯  
夷則非之何者湯無伯夷則慙而武王之臣皆虺故非

也慙不見於湯則非必見於夷光未見於武則釋先見  
於虺湯之慙夷之非武之光虺之釋皆同此憂也無武  
之光無虺之釋則天下無善治無夷之非無湯之慙則  
天下無寧君

呂祖謙

急於聞道武王之始克商也訪洪範於箕子其始踐祚  
又訪丹書於太公可謂急於聞道者真德秀

教化武王反商政之初釋箕子囚封比干墓式商容閭  
則君子賢其賢而親其親散鹿臺之財發鉅橋之粟則

小人樂其樂而利其利

有心於教武王左仗黃鉞右秉白旄以麾釋者曰左手仗鉞示無事於誅右手秉旄示有心於教牧野之戰武王何心哉

通道於九夷八蠻武王通道於九夷八蠻蓋蠻夷來王而其道自通非武王有意於開四夷而斥大境土也

成王

不以法待士大夫成王周官之告戒獨望之講學而法

無與焉先王所以厲士大夫法設不用也不以學取人而  
徒法之恃實誼所謂官徒遇之彼將官徒自為陳傅良  
為治有序內修外攘治之序也而成王黜商命滅淮夷  
乃始歸豐作周官何也境外之寇鄉隣之鬪者也先修  
而後攘可也境內之寇同室之鬪者也苟不先治其鬪  
室可得而治乎武庚三監之伐近在肘腋實係王室安  
危而淮夷亦在封域之中聲勢相倚者也二患既除然  
後創制立法之事可興矣是固治之序也呂伯蒙

得周公以輔養自古人君守成而致盛治者莫如周成  
王成王之所以成德由周公之輔養昔者周公傳成王  
幼而習之所見必正事所聞必正言左右前後皆正人  
故習與智長化與心成

程頤

關市之征文王之時關市譏而不征周公成王之時則  
關市有征矣至幽年然後弛之

秦觀

兵權不偏屬於一人昔成王將終命大臣相康王方是  
時掌兵權者太公望之子伋也宰臣召奭命作威南宮



毛取二千戈虎賁百人子伋以逆嗣子伋雖掌兵非有  
宰臣之命不敢發也召公雖制命非諸侯將命以往伋  
亦不承也兵權散主不偏屬於一人可知矣

胡安國

躬行周公之訓周公作立政以戒成王使成王不能躬  
行周公之訓則言為徒言耳今觀周官之書如撫萬邦  
巡侯甸四征弗庭即立政詰爾戎兵方行天下之意也  
如立太師太傅太保而下即常伯常任準人之意也如  
戒有官君子其爾典常作之師即其惟克用常人之意

也尊所聞行所知成王所以日進於高明光大之地歟  
司寇不言刑成王司寇之命不言刑而言掌禁者蓋治  
於已然不若沮於未然先王之立刑法惟恐天下之人入  
其中而不能自出故為之明示法禁使知有如是之罪  
必陷如是之刑人有懼心易避難犯此先王忠厚意也

宣王

備禦當周人有常言一身之內備風寒者不過幾處守  
要之說也宣王之時北有獫狁南有荆楚東有徐夷故

城東方則仲山甫矣武南國則申伯矣奄北國則韓侯  
矣四夷已備其三異時犬戎之禍乃作於西以乘其不  
備之處狐鼠之巧於伺便乘隙從古然矣一隅不謹且  
遺後患况夷垣啟鑰以縱盜之入乎

志足以立功大雅始於雲漢著其心也小雅始於六月  
著其功也編詩者之意以為有是心者然後有是功宣  
王惟其出此是以能挈天下之大器以就其能成之大功  
攘夷狄宣王之時薄伐獫狁至於太原太原周境也宣

王之治戎狄不盡吾境不置也

呂祖謙

明文武之功業政事之修則欲如庶獄庶謹之勿悞器械之備則欲如爾戈爾矛之必飭謹微接下則必如遣使之禮樂側身修行則必如內治之憂勤遣將命帥隱然采薇杖杜之歌而還定安集之民猶其在懷保惠鮮之日凡為此者固將以紹文武立治之大經而措斯世於道化盛行之日也

秦

以得人興前世論者咸以山河之險秦得百二遂并天下地勢便利使之然也所以奉春進計田肯建言著之史牘千古稱善愚謂秦人之興有由然矣自伯翳至於秦仲率以立功克守其業而僻在岐雍諸侯以夷狄待之穆公之世得人而昌廣地開國悉由任賢之功矣百里奚亡虞之臣也而授以國政孟明奔軍之將也而委以師律引咎自責卒渡河西之地由余在戎公以為憂當其來聘也降千乘之尊接以殊禮坐則曲席食則傳

器及其來歸以客卿待之故能益國十二闢地千里遂  
霸西戎而抗衡中國矣自後孝公增脩穆公之德寤寐  
賢者列爵而尊之分土而予之衛鞅以孽公子求見遂  
用其謀開阡陌急耕戰法行民便亦以稱霸後世克遵  
先軌范雎蔡澤離䟽釋躋而取卿相任賢之術速於置  
郵卒能滅二周吞六國而并天下者用此術也且蘇秦  
反覆之臣燕王一聽其言合從山東秦人不敢出函谷  
者十五年以此思一賢之功堅於山河遠矣湯以亳武

王以鎬而王天下其政何如哉百二之說於是為腐

余

元度

不師古謂先王井田不足繼而開阡陌之議謂先王鄉  
遂不足復而發閭左之兵封禪之典謂先王禮儀不足  
以飭治也參夷之誅謂先王刑法不足以齊民也

先王良法美意不復存自封建之法廢而郡縣則官无  
定守自井牧之法廢而阡陌則人無定業自什一之法  
廢而為大半之賦則民財竭矣自三日之役廢而為閭

左之成則民力盡矣其他良法美意掃地無餘

不去肉刑 三代法度秦盡變更獨不去肉刑安得不滅

石安世

失道非一日李斯佐始皇定天下不可謂不智扶蘇是  
始皇子秦人戴之久矣陳勝假其名猶足以亂天下而  
斯乃矯詔立胡亥殺扶蘇蒙恬夫蒙恬持重兵在外使  
不即受誅而復請之則斯高無遺類矣以斯之智而不  
慮此何哉曰秦之失道有自來矣豈獨始皇之罪自商



鞅變法以來以殊死為輕典以參夷為常法人臣狼顧  
脅息以得死為幸何暇復請方其法之行也求無不獲  
禁無不止鞅自謂鞅堯舜而駕湯武矣及其出亡無所  
舍然後知為法之弊矣夫豈獨鞅悔之秦亦悔之矣荆軻  
之變持兵者熟視始皇環柱而走莫之救者以秦法重  
故也李斯之立胡亥不復忌此二人者知威令之素行  
而臣子之不敢請也二人之不復請亦知始皇之鷙悍  
而不可回也豈料其偽也哉周公曰平易近民民必歸

之孔子曰有一言而可以終身行之者其恕乎夫忠恕  
為心而以平易為政則上易知而下易達雖有賣國之  
奸無所投其隙倉卒之變無自發焉然令行禁止蓋有  
不及商鞅者矣而聖人終不以彼易此商鞅立信於徙  
木立威於棄炭禍其親戚師傅積威權之劇以及始皇  
秦人視其君如雷電鬼神之不可測也古者公族有罪  
三宥然後制刑今至使人矯殺太子而不忌太子亦不  
敢請則威信之過也故夫以法毒天下者未有不反中

其身及其子孫者也

東坡

### 始皇

天厭秦嬴政之有天下也始以利幣長距雞關六國而  
擅場復以鈎爪鋸牙虎噬萬方而擇肉終以多藏厚斂  
蠶食兆民而富國然後戍五嶺築阿房驅周禮之書盡  
赴回祿惑神仙之術但崇方士收大半之賦則黔首豆  
分用三夷之刑則赭衣櫛比鯨鯢國政螻蟻人命原膏  
野血風腥雨羶民厭秦也訴之於天天厭秦也授之於

漢秦獨厭天厭民而自王乎

詩書之道廢秦以山西鑒六國欲帝萬世劉氏一呼而  
關門不守武夫健將賣降恐後何耶詩書之道廢人唯  
見利而不聞義焉耳

李泰伯

以失士而亡秦人既一天下以為六國之餘士游談於  
齊之稷下客食於四公子之門家於薛養於燕者猶在  
也而不盡去是則無以弭患設重賞酷罰以致名士欲  
盡殺而後快而不知結軌連橫之徒又溢出而聚於豐

沛之子弟耳餘之廝役報韓之黨大鄉之盜分裂四騫  
各苟富貴卒合而亡秦

陳正齋

又夫智勇辨力此四者天民之秀傑也類不能惡衣食  
以養人皆役人以自養也故先王分天下之富貴與此  
四者共之此四者不失職則民靖矣四者雖異先王因  
俗設法使出於一三代以上出於學戰國至秦出於客  
漢以後出於郡縣吏魏晉以來出於九品中正隋唐至今  
出於科舉雖不盡然取其多者論之六國之君虐用其

民不減於始皇二世然當時百姓無一人叛者以凡民之秀傑者多以容養之不失職也其力耕以奉上皆推魯無能為者雖欲怨叛而莫為之先此其所以少安而不即亡也始皇初欲逐客用李斯之言而止既并天下則以客為無用於是任法而不任人謂民可以恃法而治謂吏不必才取能守吾法而已故墮名城殺豪傑民之秀異者散而歸田畝向之食於四公子呂不韋之徒者皆安歸哉不知其槁項黃馘以老死於布褐乎抑將

輟耕太息以俟時也秦之亂雖成於二世然使始皇知畏此四人者有以處之使不失職秦之亡不若是速也

蘇軾

焚坑之謬李斯獻策始皇用之燒經書焚學士謂可以杜異見息訛謗矣然沛公一起言太公兵法運籌決勝者張良也說下秦將使敵和者陸賈也收圖籍薦大將撫根本者蕭何也陳奢靡取亡之戒者樊噲也將思歸之士出南鄭定三秦者韓信也脫輓輅言建都陳山河

百二之利者婁敬也自餘如參陵平勃之徒莫不以材  
智策烈為漢宗臣計其生時秦子楚尚未得華陽夫人  
也或伏於胥吏困於卒伍屠狗販繒寄食乞憐姓名不  
聞而往往已有蹀血咸陽俎醢祖龍之志矣始皇既不  
得而坑之方且虞心非巷議之人治偶語非今之罪是  
猶大川泛濫壞堤橫決而區區於增土石窒罅漏不亦  
愚之甚哉史謂秦愚黔首夫黔首固多愚不待秦而後  
愚也其不愚者非秦之所能愚也然則滅仁義之塗絕



諫說之辨以一身而讎疾四海之人將以過其口屈其  
心至於賊疾而不知刃迫而不見是則自愚而已

胡寅

以術留天下智者或可與取天下矣而不可與守天下  
守天下則必有大度者也何者非有大度之人則常恐  
天下之去我而以術留天下以術留天下而天下始去  
之矣自周失其政諸侯用事而秦獨得山西之地不過  
千里韓魏壓其衝楚脅其肩燕趙伺其北而齊掉其東  
秦人被甲持兵七世而不得解寸襲尺取至始皇然後

合而為一秦見其取天下如此其難也而以為不急持之則後世且復割裂以為敵國是以墮名城殺豪傑銷鋒鏑以絕天下之望其所以脩慮而固守之者甚密如此然而海內愁苦無聊莫有不忍去之意是以陳勝項籍因民之不服長呼起兵而山澤皆應由此觀之豈非其重失天下而防之太過之弊歟

蘇轍

吏不肖昔秦人之趣亡非一道也而其若是太甚者吏不肖也吾觀始皇之初陋三代之封建其弊至於戰國

髓髀相依以蹙王室故夷其城而郡縣之其慮誠遠也  
既而天下之吏習於嬴氏之暴斬刈剥啄草菅其民而  
斃之重之以頭會之斂閭左之徭又重之以阿房驪山  
土木之役當時之吏非殘忍侵漁病民以逢其君者則  
貪黷幸灾不逞之人也於是民之欲亡秦者十戶而八  
九矣關東之豪投袂而起一呼響應毛奮而鱗集戮力  
以傾秦人者不可勝計烏合之師所至如破竹者大抵  
皆郡馘其守縣俘其令以應之者也不然則吏為自全

之計挈地以賂敵而市一旦之命者也又不然則談士掉三寸之舌傳檄而風靡者也而孰為秦守哉其間黨秦之惡不肯遽臣妾者如三川之守田四川之守杜南陽之守錡亦欲驅欲潰之民疾鞭而戰之不敗而塗地則亦為降虜而已亦奚救於秦之斃耶秦以虎狼之強尺攻寸取以吞天下一夕有變三十六郡皆無人之墟子嬰之席未暖天下為漢何也秦人之憂素不及吏也知儒之不可殺爰自亡秦以詐力自私始以儒者為不

切於用雖然彼固惡之也亦有所忌而未敢誦言殺之  
也種瓜函谷設穽驪山以秦氏之暴虐殘鷙欲殺則殺  
之耳何至委曲紆餘如此意者恐天下以殺儒議已而  
始先為自文之也如是則於儒生雖然能殺而亦深自  
知其不可殺也已

君羊書考索續集卷五十四

欽定四庫全書

羣書考索續集卷五十五

宋 章如愚 編

臣道門

臯陶

刑不可有舜之九官若典禮樂也同教養也未嘗不決  
於汝諧而任刑一事獨以明允期之蓋禮樂教養不可  
一日無而刑不可一日有也

以德用刑禹稱臯陶邁種德穆王論臯陶教祇德蓋其  
職雖在於明刑而其心未嘗不本於德也

論典禮與天命天討之異臯陶曰天叙有典勅我五典  
五惇哉天秩有禮自我五禮五庸哉天命有德五服五  
章哉天討有罪五刑五用哉蓋典禮必自天子出故言  
勅我自我若夫爵人於朝與衆共之刑人於市與衆棄  
之雖天子不得而私故不言哉

楊時

以德用人九德之名自臯陶始其後周公告成王亦欲



其迪知愧恂于九德之行蓋古人之論人者必廣其有德後世之主或以材能取人而不稽諸德行故有才無德之小人得以自售其不敗事者幾希臯陶之言真萬世知人之法也

真德秀

主外治舜之時在庭之臣多矣至傳禹以天下而禹獨推臯陶何也曰舜徒得此兩人而天下已治故也禹總百揆而臯陶施刑内外之治舉矣古者兵刑之官合為一觀舜之命臯陶繼禹夏是其責也則臯陶之職所

施於外者為詳故臯陶雖不可以無禹而禹亦不可以無臯陶是以當舜之欲傳位禹乃遜於臯陶餘人不與焉孟子曰舜以不得禹臯陶為已憂而子夏亦言舜有天下選於衆舉臯陶不仁者遠矣盖有見乎此

楊時

君臣相遜刑期於無刑民叶於中此舜治也舜不敢自以為功舉而歸之臯陶曰時乃功臯陶不敢自以為功曰帝德罔愆而舜猶曰俾予從欲以治惟乃之休此足以見君臣相遜之美而上下常有懍然不自居其功之

意也

稷

體阻飢之心見乃粒之民以舜之時烝民乃粒何嘗阻飢然舜之命棄乃若是云者蓋欲棄嘗體阻飢之心見乃粒之民若見阻飢之民則百穀不期而自播矣

為生民立命萬世開太平禹稷思天下溺由已溺思天下飢由已飢便是為生民立命烝民乃粒萬邦作乂便是為萬世開太平

變

其教即大司樂之樂德樂語唐虞之時任於朝者非天子之族類則世臣巨室之家其起於耕釣側微者不過數人豈當時世家子弟皆賢哉亦教之有道耳然舜之命官以教胄子也必屬之典樂之變何哉蓋古之教者不在於辭令文章惟長善救失以成其德故優而游之使自求之饜而飫之使自趨之夫樂者所以和平其心志而導達其善性也此舜之教胄子所以先諸樂歟周

官大司樂以樂德教國子中和祗庸孝友以樂語教國子興道諷誦言語自直而溫至簡而無傲即教以樂德也自詩言志至律和聲即教以樂語也

典樂兼教典樂教胄子見夔兼兩事既典樂又教胄子樂與教不可以不並樂者廣大易直感人也深故掌樂必兼教之任動盪感發使人之良心悠然而生教人之道無大於此周之大司樂掌成均之法漢之太常猶領太學其名久而不廢也

呂祖謙

伊尹

卓然獨見或問古人卓然獨見者誰為最先生曰伊尹  
或曰何謂先生曰伊尹去堯舜之世已遠絕無師承堯  
傳之舜舜傳之禹自此以往寂寥數百載伊尹斷然號  
於人曰予天民之先覺者也及湯學於伊尹故湯得伊  
尹之傳曰文武曰周公曰孔子由此傳之也不是獨見  
得到何由敢自任如此

張九成

樂堯舜之道伊尹耕於有莘之野以樂堯舜之道夫堯

舜之道豈有物可玩而樂之乎即耕於有莘之野而已  
此農夫田父之所日用者而伊尹之樂有在乎是若伊  
尹則所謂知之者也 楊時

取予合義一介與萬鍾若論利害則有多寡若論義其  
理一也伊尹惟能一介知所取予故雖祿之天下不顧  
繫馬千駟弗視後世觀之則一介不以予諸人為太吝  
一介不以取諸人為太潔然君子之取予適於義而已  
予之畷取之微雖若不足道矣然苟害於義又何多寡

之間乎孔子於公西赤之富不恤其請於原思之賢不許其辭此知所予者也孟子言非其道則簞食不可受於人如其道則舜受堯之天下不以為泰此知所取者也  
同上

從容於處利害之際湯方聘伊尹於莘尹幡然而從之豈必於伐桀哉苟可與為堯舜之君者初無擇也豈特伊尹為然雖湯亦然故五就桀者亦湯志也至於五反而不能至然後止於亳而伐桀之謀定此湯伊尹之本



心也然後放天子太甲不以為嫌及其復之太甲不以為怨從容去就如處湯桀之間蓋惟無利桀之心雖伐而不疑於亂惟無奪太甲之志雖放而不疑於篡此聖人之事常人所不能測也

有天下之大節辨天下之大事者有天下之大節者也立天下之大節者狹天下者也夫以天下之大而不足以動其心則天下之大節有不足立而大事有不足辨者矣孟子曰伊尹耕於有莘之野非其道也非其義也

雖祿之天下不受也夫天下不能動其心是故其才全  
以其全才而制天下是故臨大事而不亂夫太甲之廢  
天下未嘗有是而伊尹始行之天下不以為驚以臣放  
君天下不以為僭既放而復立太甲不以為專何則其  
素所不屑者足以取信於天下也彼其視天下眇然不  
足以動其心而豈忍以廢放其君求利也哉

蘇軾

人知其志於太甲復位之時伊尹之志其自知則在遷  
太甲於桐之日人知其志則在奉太甲歸亳之時

善進諫太甲一篇合伊訓而觀之然後知伊尹納誨之  
不可及後世人臣至于再三鮮不以辭氣忿怒浸至不  
平伊尹三節進戒一節反緩於一節伊訓之作太甲過  
未形之時也其言庸傷有哀悼不能自己之意及其過  
已形而太甲一篇乃雍容和緩不傷悼痛切伊訓言爾  
惟不德罔大隆厥宗隆宗則九廟為墟矣使人凜然有  
危懼之意至太甲但曰忝厥祖忝祖之言視隆宗之言  
為孰嚴其曰無越厥命以自覆無之一字辭旨從容亦

非隆厥宗之斷斷也況又曰惟懷允圖曰萬世有辭期  
望之意愈至詳味太甲首篇溫乎春風和氣中有陶然  
自得之意及觀伊川格言大訓明倫森嚴如武庫矛戟  
森列何也臣之事君如子之事父事父母幾諫見志不  
從又敬不違勞而不怨夫父母有過諫之於幾微而不  
從常情或有忿激之心忿激之心生則諫諍之言過其  
傷多矣為孝子者加敬而不違雖勞而不怨其色愈恭  
其氣愈和其言愈從容而不敢迫也伊尹聖人太甲庸

君伊尹元老太甲幼主而事之如父此其所以聖也  
祖謙

傳說

高宗素知傳說昔高宗之於傳說其知之舊矣豈真足  
以夢得哉惟夫踈遠之士欲舉而置之貴近之右未有  
以信於天下也故假諸夢以神之故孟子告齊宣王曰  
必不得已而使卑踰尊踰戚不可不重  
陳傅良

學無止法傳說告高宗以典學曰終始不曰始終學無

止法也 真德秀

開聖學之源學之一事前此未經見也說命曰惟教學  
半曰念終始典于學於是始有學之名遂開萬古聖學  
之源其功亦大矣哉 同上

高宗之得說以心之道高宗之用人不求之於必可得  
之人而求之於不可知之夢事近恠矣然高宗審其所  
夢之象而旁求之於天下而并以其所夢之意告之於  
人而舉朝之人不恠且疑耶使者四出交錯道路而傳

巖之野負版之役夫儼然肖焉遂載而去之而說亦不  
辭舉朝之臣與其天下之人與其同役胥靡之人其愈  
不恠且疑耶既至而相之命之為礪命之為霖雨命之  
為舟楫命之為瞑眩之藥自比於弗視地之跣其勤若  
是其誠若是耶以高宗之不言且夢帝而得之且形貌  
求而肖之且舉版築而相之且命之則說宜有驚世之  
智絕人之謀而徒曰從諫好學之類而已耶而高宗又  
從而信受之服行之終始尊任之卒以繼伊尹之功而

興商何耶甚矣其不恃其力以致物而以其心而致物也如此葉適

周公

用天子禮樂問賜周公以天子之禮樂當否曰始亂周公之法度者是賜也人臣安得用天子之禮樂哉成王之賜伯禽之受皆不能無過記曰魯郊非禮曰周公其衰矣聖人常識之矣說者乃云周公有人臣不能為之功業因賜以人臣不得用之禮樂則妄也人臣豈有不



能為之功業哉借使功業有出於周公亦是人臣所當  
為爾人臣不當為其誰為也

程顥

誠於任管叔管叔不令公宜無不知也與其使之監商  
而終致辟焉孰若封之有庠富貴之而已耶游氏曰象  
以殺舜為事其凶愚既已暴於世矣觀其志亦不過欲  
富貴而已舜以兄之道處之故封之有庠而使吏治其  
國所以處象而全之也若管叔之德未著於迹其才又  
非象比也其志亦未可量周公詎忍逆探其兄之不仁

將自絕於君親而棄之耶若為有庠之封則彼將以為  
鄙我而速亂耳周公之親愛其兄宜無不盡其道矣管  
叔之事聖人之不幸也舜誠信而喜象周公誠信而任  
叔天理人倫之至其用心一也

呂大臨

不相忌召公為保有欲去之志周公反覆留之不遺餘  
力後世權位相軋之際排之使去則多有之挽之使留  
蓋亦鮮矣周公固不可以後世論也然大臣之秉心公  
則惟恐無助私則惟恐不專公私之間世主所當深察

也 呂伯恭

待士周公之治天下何如其治計其一時之士雖賢且能孰有出周公之右者也雖有智計謀議孰有出周公之意者也以周公而輕天下之士則天下之士夫誰議而周公則不爾也沐不敢暇擲也食不敢下咽也周公非不敢也周公則以為不沐不食不過足以病吾之一身耳不幸而失一士則足以病天下病風俗吾則不忍以一身之安而易天下之病風俗之病也

羣書考索續集卷五十五

欽定四庫全書

羣書考索續集卷五十六

宋 章如愚 編

聖賢門

孔孟

顏子附

孔與天一孟聽天所命孔子謂天之將喪斯文也後死者不得與於斯文則文之興喪在孔子與天為一矣蓋聖人之德盛與天為一出此等語自不覺爾孟子地位

未到此故曰夫天之未欲平治天下也如欲平治天下  
當今之世捨我其誰聽天所命未能合一

辯害教者天下之事有害於教者聖賢辯之有害於已  
者聖賢不辯少正卯楊墨害教者也故孔孟辯焉向魍  
臧倉害已者也而孔孟豈復辯乎庸人反是

石安世

論孟所言異而同論語之言無所不包而其所以示人  
者無非操存涵養之要七篇之旨無所不究而其所以  
示人者類多體驗充廣之端夫聖賢之分其不同固如

此然體用一源也顯微無間也

朱熹

知人時無孔子顏子歿於陋巷而少正卯為聞人時無

孟子匡章陷於不孝而陳仲子為廉士

劉彥冲

孔俯就孟高致孔子教人常俯就不俯就則門人不親

孟子常高致不高致則門人不尊

程顥

孟子常自尊其道而人不尊孔子孟自卑而人益尊之

聖賢固有間矣

同上

孔孟言語之異孔子言語句句是自然孟子言語句句

是事實

孟子未至孔子孔子為陪臣為宰皆能發明大道孟子  
必得賓師之位然後能明其道譬如有許大形象然後  
為泰山有許多水然後為海所以未至孔子

程顥

孔孟不棄天天之所以予我者不偶然也夫其所以予  
我者必有以用我也孔子孟軻之不過老於道塗不倦  
不愠不怍不沮者夫固知夫責之所在也衛靈魯哀齊  
宣梁惠之徒之不足相與以有為也我知之矣抑將盡



吾心焉耳吾心之不盡吾恐天下後世無以責夫衛靈  
魯哀齊宣梁惠之徒而彼亦將有以辭其責也然則孔  
子孟軻之目將不瞑於地下矣夫聖賢之用心也固如  
此蘇洵

氣象之異仲尼元氣也顏子春生也孟子并秋殺盡見  
仲尼無所不包顏子亦不違如愚之學於後世有自然  
之和氣不言而化者也孟子則露其才蓋亦時焉而已  
仲尼天地也顏子和風慶雲也孟子泰山巖巖之氣象

也仲尼無迹顏子微有迹孟子其迹著

程顥

孔子

十年一化孔子之聖固天縱也而造次顛沛未嘗忘學  
自志學至從心十年一化大聖自脩猶節節而進

劉彥

沖

文武相濟昔諸侯暴武之時孔子曰俎豆之事則嘗聞  
之此聖人救之以文也及夾谷之會孔子則曰有文事  
者則有武備請設左右司馬此聖人濟之以武也

范仲

淹

不言之辯不得已之權孔子不見孺悲有不言之辯見

陽虎有不得已之權

謝諤

神化夫善人為邦百年方能勝殘去殺比之王者則多  
七十年矣王者必世而後仁比之孔子則多二十七年  
矣夫子攝行相事於魯七日而誅少正卯凜然有戮飛  
廉驅虎豹膺夷狄之風為政止三月耳羔豚不貳價男  
女別於途道不拾遺客至如歸肅然已有無思犯禮莫

不好德之風行之一年其如何哉其曰三年有成者夫子而居其聖也謂之賢於堯舜生民未有豈過論哉

張

九成

綱紀治功苟有用我者朞月而已可也三年有成仲尼言有成者蓋欲立致治之功業如堯舜之時夫是之謂有成此聖人之事非他人可及故嘗言後世論治者皆不中道理漢公孫丞相謂三年而化臣弘尚切遲之唐李石謂十年責治太早皆率爾之言聖人之言自有次

第所謂晷月而已可也綱紀布也三年有成治功成也

程順

不言之用子羔之為宰有所不取而必說乎未信之漆  
雕子張之干祿有所必辨而獨賢乎屢空之顏子三子  
之言志有所不進而惟與乎詠歸之魯點

深知門弟夫子之於門人其念慮所起平生所志雖未  
形於顏色語言夫子固已得之矣如魯子不問夫子見  
其何處遽提其名指之曰吾道一以貫之子貢不問夫

子見其何事遽提其名指之曰汝以予為多學而識之者歟子夏無一語也夫子忽斥其短曰女為君子儒無為小人儒子路無一語也夫子忽斥其短曰由也不得其死然聖人內外明映羣弟至前顏色未萌言語未發其幽隱微密夫子已坐照於不言中矣

憂在天下天生孔子不獨為魯雖孔子其憂亦未嘗不在天下也周之末列國爭為雄長而天下騷然苦兵孔子拳拳於其間欲以一已捍天下之難故不用於魯則

之齊之衛之荆之陳之蔡不用於諸侯則欲為政於費  
不用於中國則欲為政於蠻夷車馬之迹環於四方雖  
流離困厄而不悔聖人憂天下之不得其所而欲行其  
道如此其勤也

李邦直

作成門弟洙泗之濱席間函丈聖化天運達乎貢之學  
而一貫自通達顏淵之才而卓爾自見或聲或歎或顧  
或盼或笑或語一警之下萬慮消亡

呂祖謙

處身與處國不同昔夫子能忍匡人之圍而不能忍菜

夷之兵能忍南子之見而不能忍優施之舞聖人之心  
何其多變也處身之與處國其法固不相參也毀辱在  
身聖人納之而不校也此匡人之圖南子之見夫子所  
以未嘗動一念也毀辱在國聖人競之而不置也此萊  
夷之兵優施之舞夫子所以未嘗一毫貸也

同上

語默皆道以謂無隱乎爾則天何言哉夫子之言性與  
天道不可得而聞也以謂有隱乎爾則四時行焉百物  
生焉夫子之文章不可得而聞也豈真不可得而聞哉



詩云鳶飛戾天魚躍于淵此天下之至顯聖人烏得而  
隱哉所謂吾無行而不與二三子者也上天之載無聲  
無臭此天下之至顯聖人亦烏得而顯哉宜其二三子  
以為有隱乎我者也謝顯道

門人皆有用之才夫子之門人顏閔伯牛可以為輔相  
仲弓可以為諸侯宰我子貢可以使四方冉有可以治  
兵賦子路可以為將帥子游子夏可以立制度而不免  
厄於陳蔡此則天也范祖禹

鄉黨一篇該盡聖人自孔子於鄉黨至閭閻如也言孔子言語之變自君在跼蹐如也至私覲愉愉如也言孔子動容之變自君子不以紺緌飾至齊必有明衣布言孔子衣服之變自齊必變食至必齊如也言孔子飲食之變自席不正不坐至不親指言孔子應事接物之變

呂大臨

樂天仲由樂善故車馬衣裘喜與賢者共敝顏子樂道故愿無伐善施勞聖人樂天故合內外而成其仁

張載

言無非道今觀夫子之與顏閔言也見聖人之粹乎其  
溫而非和也觀夫子之與由求言也見聖人之厲乎其  
嚴而非高也觀其與宣哀諸時君言見其慊乎其不倨  
而非靡也觀其與季孟諸大夫言見其端乎其不撓而  
非矯也至於立教之言則寬乎不迫而不至於肆傷時  
之言則愀乎不平而不至於感人見其為言也吾見其  
為道也

生知後天地而生知天地之始先天地而歿知天地之

終

夾谷之會觀孔子夾谷之會折強齊卻萊人戮侏儒歸  
侵疆此即大禹決汝漢排淮泗周公膺戎狄驅猛獸之  
規模也盛矣哉

張九成

寬猛各當每讀論語觀孔子進互鄉見師冕與鄉黨一  
篇何其雍容如此及為魯司寇少正卯非有顯然可指  
之惡一旦誅之於兩觀尸之於朝三日又何其可畏也  
不如此何以為孔子

同上

禮樂仲尼有其德而無其位於禮嘗言而不制故或行  
夏或善殷或從周於樂嘗正而不作故雅頌各得其所  
如有用者則以其所言制為之禮以其所正作為之樂  
故其禮貫先聖後聖之精義其政有不盡乎樂集古今  
之正聲其德有不至乎

呂大臨

學有形容難盡一時從游竭所力窮所見於不可形容  
之中而強名之曰麟鳳歟河岳歟日月歟生民以來未  
之有歟性與天道間不可得歟堅高前後卓不可從歟

溫良恭儉讓蓋清可為也而難於溫溫者清和之發也和可為也而難於良良者易直之發也本無侮人之心貌如之何而不恭本無侈泰之心用如之何而不儉本無競強之心行如之何而不讓至於此則泰然矣儼然矣其泰然也豈不如春其儼然也豈不如秋豈不容貌可觀豈不威儀可象豈不和樂豈不莊敬遠暴慢不足道也遠鄙倍不足道也夫容貌如此諸弟子豈不能學以致之乎蓋有忿懣之心者必不溫有忤尅之心者必

不良有欲上之心者必不恭有驕人之意者必不儉有  
物我之心者必不遜則溫良恭儉讓其惟聖人能之乎  
謝顯道

係周易道充乎一性吾則粹聖人之淵道周乎萬物吾  
則恢聖人之天吾道其淵耶粹然者或可養而成吾道  
其天耶恢然者不可強而得宗廟其美百官其富宮牆  
其數何豈不足以極綏來動和之機然天下幸不幸難  
以自決而厚化之德卒不能恢其覆幬之天吾寧淵其

淵不時出而用之春生秋殺一字已嚴陶冶諸子天巧已妙吾心所潛吾道所習自不應徒嗜韋編而不有以發其蘊也馬圖祕於河而斯文善其未喪周夢耑於吾而木鐸振其遺音三古之所未該三聖之所未悉吾一槩而竟發之則前日淵淵之淵豈不為今日溥博之天耶羽翼大成翱翔萬世烏憊乎鳳儀之不至也

劉穆元

周公富貴不如孔子貧賤每讀詩至鴟鵂讀書至君奭嘗切悲周公之不過及觀孔子厄於陳蔡之間而絃歌



之聲不絕顏淵仲弓之徒相與問荅夫子曰匪兕匪虎  
率彼曠野吾道非耶吾何為至此顏淵曰夫子之道至  
大故天下莫能容雖然不容何病不容然後見君子夫  
子油然而笑曰回使爾多財吾為爾宰夫天下雖不能  
容而其徒自足以相樂如此乃今知周公之富貴有不  
如夫子之貧賤夫以召公之貴以管蔡之親而不知其  
心則周公誰與樂其富貴而夫子之所與共貧賤者皆  
天下之賢才則亦足與樂乎此矣

居其偏以收天下之全昔者夫子廉潔而不為異衆之行勇敢而不為過物之操孝而不徇其親忠而不犯其君若此者是夫子之全也原憲廉而至於貧公良孺勇而至於鬪曾子孝而徇其親子路忠而犯其君凡此者是數子之偏也夫子居其全而收天下之偏是以若此

巍巍也 蘇軾

墮三都蓋田氏六卿不復則齊晉無不亡之道三家不臣則魯無可治之理孔子之用於世其政無急於此者

矣彼晏嬰者亦知之曰田氏之僭惟禮可以已之在禮  
家施不及國大夫不收公利齊景公曰善哉吾今而後  
知禮之可以為國也嬰能知之而莫能為之嬰非不賢  
也其浩然之氣以直養而無害塞乎天地之間者不及  
孔孟也孔子以羈旅之臣為政期月而能舉治世之禮  
以律亡國之臣墮名都出藏甲而三家不疑其害已此  
必有不言而信不怒而威者矣孔子之聖見於行事至  
此為無疑矣嬰之用於齊也久於孔子景公之信其臣

也愈於定公而田氏之禍不少衰吾是以知孔子之難也

因才而成之蓋孔子之所以教人者始於洒掃應對進退及其安之然後申之以弦歌廣之以讀書曰道在是已仁者見之斯以為仁智者見之斯以為智矣顏閔由是以得其德子賜由是以得其言求由由是以得其政游夏由是以得其文皆因其才而成之譬如農夫耨田以植苗大小長短甘辛鹹苦皆其性也吾無加損焉能

養而不傷耳

無可無不可夫子之於晚周苟可以任不必皆明君也  
苟可以交不必皆賢卿大夫也苟可以教不必皆才子  
弟也聖人之道非固如此徇乎人也不如是則道之不  
行於天下其過不專於人而吾亦與有愧焉故也 陳傳  
良

集大成天德出寧時而措之夫焉有所倚曲肱飲水之  
非清柔田委吏之非和而木鐸斯文之非任歟

顏子

惟發二問顏子終日如愚論語所載惟發二問一為仁一為邦夫子荅之皆極天理人事之大者原易之用內焉惟窮理盡性外焉惟開物成務顏子盡之

樂道子夏曰仕而優則學學而優則仕君子之未仕也以學為始其既仕也以學為終昔者仲尼之門輕許人以仕而重許人以學由之果賜之達求之藝聖人各取其一節而以從政許之至其論學則不然哀公嘗問於

夫子矣則對曰回也好學李康子嘗問於夫子矣則對  
曰回也好學夫三千之徒四科之目如此其衆多而號  
為好學者獨顏子一人而已嗚呼何其難也 或問聖  
人之門其徒三千獨顏子為好學夫詩書六藝三千子  
非不習而通也然則顏子所好者何學也曰學以至聖  
人之道也然聖人則不思而得不勉而中顏子則必思  
而後得勉而後中其與聖人相去一息所未至者守之  
也非化之也以其好學之心假之以年則不日而化矣

程順

樂道回不改其樂是猶大火中真金乎疾風中勁草乎

雪霜交下而松柏自有和氣乎 顏子之樂非樂簞瓢

陋巷也不以貧屢累其心而改其所樂也故夫子稱其

賢

程順

忘富貴貧賤或問富貴而矜貧賤而嘆使處富貴如處  
貧賤處貧賤如處富貴則矜嘆不發先生曰見得一者  
難使顏子以貧賤處貧賤又安得樂顏子於此非特忘



富貴而貧賤亦忘了此人所以雖視之不堪而回則不改也所見到此便是樂天 夫富貴人所愛者也顏子不愛不求而樂乎貧者獨何心哉天地間而有至貴至愛可求而異乎彼者見其大而忘其小焉耳得其大則心泰心泰則無不足富貴貧賤處之一也處之一則能化而齊故顏子亞聖

周茂叔

顏子簞瓢非樂也忘也

程順

克己復禮顏淵之問仁夫子一語仆藩牆去陞級撤堂

室而納之於甚大之地付之以一日克己復禮天下歸  
仁之事何其大也此君子之所驚也及顏子領其大請  
其目則不離於視聽言動之間倣於非禮而已又何其  
小也此君子之所忽也惟其大而不驚此顏子之所以  
獨往小而不忽此顏子之所以獨來何也已也者人之  
欲也禮也者天之理也仁也者性之覺也克而復復而  
覺人者去而天者還則天高地下吾性之湛也雲行雨  
施吾性之游也君臣父子仁義禮樂吾性之觸也一理

徹而萬理融當是之時一者非寡萬者非衆徹者非唱  
融者非隨夫何故吾心之仁無寡也焉得心無唱也焉  
得隨至則皆至不至則皆不至見則皆見不見則皆不  
見至矣見矣頃刻而天下皆吾仁吾猶達之而何驚於  
一日而天下歸仁也哉

張九成

四非之目顏淵問克己復禮之目夫子曰非禮勿視非  
禮勿聽非禮勿言非禮勿動四者身之用也由乎中而  
應乎外制於外所以養其中也

程頤

與禹稷同道知合內外之道則顏子禹稷所同可見蓋  
自正心誠意推之至於可以平天下此內外之道所以  
合也故觀其意誠心正則知天下由是而平觀其天下  
平而知其非意誠心正不能也茲禹稷顏子所以同也  
見其進未見其止未至聖而不已故仲尼賢其進未得  
中而不居故惜夫未見其止也

張載

勇或問顏子為人似乎怯曰孰勇於顏子觀其言曰舜  
何人也予何人也有為者亦若是有若無實若虛之類

抑可謂大勇者矣

楊萬里

樂聖道之實聖人之道有超其名而好之者有安其實而樂之者昔者宰我子貢有若更稱其師以為生民以來未有如夫子之盛雖堯舜之賢亦所不及其尊道好學亦已至矣然而君子不以為貴曰宰我子貢有若智足以知聖人之汙而已矣若夫顏淵豈亦云爾哉蓋亦曰夫子循循然善誘人由此觀之聖人之道果不在於張而大之也

東坡

閔子騫

不輕仕閔子顏淵之倫也不仕於大夫亦不仕於諸侯  
以仲弓之賢猶為季氏宰若顏閔者夫子之得邦家斯  
仕矣

范祖禹

又學者能少知內外之分皆可以樂道而忘人之勢况  
閔子騫得聖人為之依歸彼其視季氏不義之富貴不  
啻如犬彘又從而臣之豈其心哉在聖人則有不然者  
公山弗擾佛肸亂人也召夫子夫子欲應之季氏雖不

臣夫豈不知我而欲以為宰也閔子辭之何也蓋居亂  
邦見惡人在聖人則可在他人則不可所謂磨而不磷  
涅而不緇蓋其變化莫測人雖欲殺之亦不可得也况  
得而汙之乎自聖人而下剛則必取禍柔則必取辱閔  
子豈不能早見而豫待之乎如由也不得其死於衛求  
也為李氏附益夫豈二子本心哉蓋既無先見之智又  
無克亂之才故也然則閔子其賢矣乎

謝顯道

孝子騫之行能使其父母昆弟人無間言此難能也舜

之父母兄弟以頑嚚傲聞於天下然則閔子賢於舜乎  
曰舜以諧頑嚚瞽瞍底豫為孝閔子以善父母兄弟為

孝

范祖禹

子貢

善問孔門惟子貢最為善問冉有曰夫子為衛君乎子  
貢曰諾吾將問之及其入也不問衛君乃問夷齊夫子  
告以求仁而得仁又何怨子貢遂知夫子之不為父如  
子路問魯大夫練而杖禮與夫子曰不知及子路以語



子貢子貢乃不指魯大夫而問夫子遂荅以非禮觀此可以見子貢之善問

張九成

以了悟為聞子貢謂夫子之言性與天道不可得而聞既言夫子之言則是居當語之矣聖門學者以仁為己任不以苟得為得必以了悟為聞

張載

留情於富貴為貨殖子貢之高識曷嘗規規於貨利哉特以豐約之間不能不留情耳且貧富有命彼乃留情於其間多見其不信道也故聖人謂之不受命有志於

道者要當去此心而後可語也

程顥

學造於小成器者成材之謂學者充實時也使其能輝  
光何害其為不器何害其為形而上者子貢聖門之達  
者於道體無不窺見設未能從容而安亦可不謂之小  
成乎孔子以器許之猶後世以通達治體者謂之國器  
未可執方論也

謝顯道

問一知二知類通達至極其數者顏子也凡物有對舉  
其偏而知其對者子貢也

呂大臨

聞文章而知性與天道夫子之文章異乎人之所謂文章夫子之言性與天道異乎人之言性與天道子貢之聽言異乎人之聽言也他人聞夫子之文章止於文章而已子貢聞夫子之文章於其間知所謂性為天道使子貢智不足以知此則又安能語此則夫子可不謂善言乎子貢可不謂善聽乎後世諸子言性與天道者多矣言紛紛使人彌不識者亦異乎夫子之言矣後世學者觀著於章句之外毫髮無所得也亦異乎子貢之聞

矣謝顯道

學不及曾子子貢之於學不及曾子也如此孔子語曾子一以貫之蓋不待其問而告曾子復深喻之曰唯至於子貢則不足以知之矣故先發其問曰女以予為多學而識之者與果不能知之以為然也又復疑其不然而請焉方告之曰予一以貫之雖聞其言猶不如曾子之唯也

尸時

季路

死生鬼神子路學於夫子以事鬼神為問又以死為問  
子路之心蓋以人者吾所自知所不知者鬼神而已生  
者吾所自知所不知者死而已蓋至理無二知則俱知  
惑則俱惑安有知此而不知彼者哉子路果知人則必  
無鬼神之問矣子路果知生則必無死之問矣觀其鬼  
神之問可以占其未知人也觀其死之問可以占其未  
知生也夫子答之曰未能事人焉能事鬼未知生焉知  
死此蓋夫子提耳而誨子路無非真實語世儒乃或以

為拒子路之問豈不衰哉子路深省於一言之下故白  
刃在前結纓正冠不改其操則死生鬼神之際子路其  
知之矣

呂祖謙

喜聞過仲由喜聞過令名無窮焉今人有過不喜人規  
如護疾而忌醫寧滅其身而無悟也噫

周茂叔

百世之師子路亦百世之師

程明道

勇則不惑道無乎不在無往而不可也故曰蠻貊之邦  
行矣又曰欲居九夷然而孔子未必行未必居焉有可

行可居之理則必明之公山弗擾佛肸之召欲往而卒  
不往者明其可往而已仲由好勇故可以受此言他人  
則不能不惑無勇必多疑故也由知夫子之可從海之  
可往而不知不必往焉此知進而不知退能勇而不能  
怯者也

范祖禹

可與患難子路在聖門最為可與共患難者

謝顯道

言志顏淵季路與夫子言志夫子安仁也顏淵不違仁

也季路求仁也

程頤

曾子

一貫忠恕夫道一而已矣天地一指也萬物一馬也無往而非一此至人所以為無己也豈參彼己所能與哉此忠恕所以近道為其一以貫之也雖然忠所以盡己恕所以盡物則欲求入道者宜莫近於此此忠恕所以違道不遠也子曰參乎吾道一以貫之曾子曰唯使曾子之知不足以及此則仲尼不以告而曾子不自誣矣今日忠恕而已者所以告門人也孟子曰萬物皆備於



我矣反身而誠樂莫大焉此仲尼告曾子之道也強恕  
求仁莫近焉此曾子告門人之道也然則曾子豈有隱  
於是耶蓋門人之知不足以及此而強告之適所以滋  
其惑使門人誠於忠恕則於一道亦何遠之有

游酢

事親事親若曾子可也未嘗以曾子之孝為有餘也蓋  
子之身所能為者皆所當為也

程頤

能之短而明之卓夫子稱回之愚參之魯而聖人之傳  
乃愚與魯者得之學者求其說而不得則曰愚與魯道

之資也智與慧性之翳也嗟夫言之似也而差之何也  
回之愚夫子蓋嘗言其如愚而不愚矣則回之愚豈其  
真而學者猶以為真也若參之魯夫子言之未及盡也  
執夫子未及盡之言而以參為真魯參又何辭焉雖然  
參不病也學者病也右愚魯而左智慧則納天下之人  
於莊周之瓦礫佛道之寂滅也豈不病哉且參之魯豈  
蒙然癡暗然昧耶子曰吾道一以貫之門人相顧莫知  
所依據而參也領之以一唯蒙然癡暗然昧者能之乎

然則參非真魯者也非魯而曰魯無乃言語之不給文  
學之未敏歟言語之給文學之敏君子非有廢也而非  
所先蓋言語者道之汲而汲者非道也文學者道之寓  
而寓者非道也言語之不給曰魯可也文學之不敏曰  
魯可也而魯非道之賊也非道之賊而亦非道之資人  
之資有所明有所能能者事之資也明者道之資也參  
之魯短於能者也非事之資而已矣非事之資而移以  
為道之資道固無用於能而亦何用於不能哉謂能可

以入道者妄也謂不能可以入道者大妄也道則有可  
以入者矣曰明是也參也能之短而明之卓則其為道  
之資者以其卓者也今也取其短而謂為道之資又欲  
去其卓而謂為性之翳不知其所謂翳者乃參之所以  
為資而其所謂資者乃參之無所用於道者也

所見大曾子傳聖人學其德後來不可測安知其不至  
聖人如言吾得正而斃且休理會文字只省他氣象極  
好被他所見處大後人雖有好言語只被他氣象卑終

不類道

傳道以魯蓋嘗謂魯子在孔門當時以為魯學道宜難於他人然子思之中庸聖學之所賴以傳者也考其淵源乃自曾子則傳孔子之道者曾子而已矣豈非以魯得之乎由此觀之聰明智未必不害道而剛毅木訥信乎於仁為近矣

楊時

參也竟以魯得之

明道

子思

率性致中子思之學不恃其性而恃其率不恃其中而

恃其致率也者循是教焉者也致也者力而求之者也  
性不可見而率性可見中不可能而致中者可能

楊萬

里

言與湯合子思言天命之性即湯之所謂降衷其言率  
性之道修道之教即湯之所謂克綏厥猷惟后

真德秀

言與堯舜合夫子傳堯舜之道當是時見而知之者惟  
顏氏曾氏之傳得其宗及曾氏之再傳而復得夫子之  
孫子思則去聖遠而異端起矣子思懼夫愈久而愈失

其真也於是推本堯舜以來相傳之意質以平日所聞  
父師之言更互演繹作為中庸之書以詔後之學者蓋  
其知之也深故其言之也切其慮之也遠故其說之也  
詳其曰天命率性則道心之謂也其曰擇善固執則精  
一之謂也其曰君子時中則執中之謂也世之相後千  
有餘年而其言之不異若合符節歷選前聖之書所以  
提挈綱維開示緼奧未有若是其明且盡者也 朱文公  
善立論孟子之所謂性善者皆出於其師子思之書子

思之書皆聖人之微言篤論孟子得之而不善用之能  
言其道而不知其所以為言之名舉天下之大而必定  
以性善之論昭昭乎自以為的於天下使天下之過者  
莫不欲援弓而射之故夫二子之為異論者皆孟子之  
過也若夫子思之論則不然曰夫婦之愚可以與知焉  
及其至也雖聖人有所不知焉夫婦之不肖可以能行  
焉及其至也雖聖人有所不行焉聖人之道造端乎夫  
婦之所能行而極乎聖人之所不能知是以學者不知



其所窮夫如是則惻隱足以為仁而仁不止於惻隱羞  
惡足以為義而義不止於羞惡此不亦孟子之所以為  
性善之論歟子思論聖人之道出於天下之所能行而  
孟子論天下之人皆可以行聖人之道此無以異者而  
子思取必於聖人之道孟子取必於天下之人故夫後  
世之議者皆出於孟子而子思之論天下同是而莫之  
或非焉然後知子思之善為論也

孟子

於時君人欲中開道其路放鄭聲所以告顏子也豈容  
有今樂古樂之說焚咸丘所以書春秋也豈於好樂之  
外復有田獵之說是孔子之道至孟子一失矣嗚呼魯  
人獵較孔子亦獵較顧在用之如何耳孟子之於時君  
特於當時人欲中開道其路使駸駸入先王之道而不  
覺如好勇不妨其安天下好貨好色不妨其於百姓同  
之好麋鹿魚鼈好今之樂不妨百姓同樂此善用也  
明王道闢異端孟子卑管仲而狹許行貉白圭而蚘仲

子禽獸楊墨妾婦儀秦

張九成

變孔子之論而歸於正孔子之論多論其常孟荀之論多論其變然孟子則變孔子之論而歸於正荀子則變孔子之論而流於邪孔子曰言忠信行篤敬雖蠻貊之邦行矣至於孟子則曰言不忠信行不篤敬惟義所在斯不亦變而歸於正乎孔子曰非禮勿視非禮勿聽非禮勿言非禮勿動至於荀子則曰禮起於聖人之偽斯不亦變而流於邪乎夫人之所守所學不可因時而遷

徙觀二子同生戰國而孟子歸於正是無戰國之心苟  
子流於邪是有戰國之心也 石安世

有大功四孟子有大功四明浩然之氣道性善闢楊墨  
黜五伯而尊三王皆前聖之所不載有功於名教

性善嘗讀中庸之書曰天命之謂性率性之謂道又曰  
能盡其性則能盡人物之性可以贊化育參天地質之  
以此而後孟子之說始信性果惡耶則違性之謂道可  
也烏用率且性既惡則盡性之所至當逆天地而戾人

物矣奚其贊又奚其參

楊萬里

浩然之氣上天之載無聲無臭其體則謂之易其理則謂之道其用則謂之神其命於人則謂之性率性之謂道修道則謂之教孟子去其中又發揮出浩然之氣可謂盡矣

程顥

功不下禹昔者禹以其身拯天下之溺而孟軻氏以其道拯人心之溺其事雖異其於救世則同此韓愈所以謂功不在禹下也

有禹稷事功人須學顏子有顏子之德則孟子之事功自立孟子者禹稷之事功也

程順

正人心孟子一書只是要正人心教人養性存心收其放心至論仁義禮智則以惻隱羞惡辭遜是非之心為之端論邪說之害則曰生於其心害於其政論事君則欲格君心之非正君而國定千變萬化只從心上來人能正心則事無足為者矣

楊時

正君心孟子三見齊王而不言事曰我先攻其邪心心

既正而後天下之事可得而理也夫政事之失用人之  
非知者能更之直者能諫之然非心存焉則事事而更  
之後復有其事將不勝其更矣人人而去之後復有其  
人將不勝其去矣是以輔相之職必在乎格君心之非  
然後無所不正 真德秀

知易春秋孟子曰可以仕則仕可以止則止可以久則  
久可以速則速孔子也孔子聖之時者也故知易者莫  
若孟子孟子曰王者之迹熄而詩亡詩亡然後春秋作

春秋無義戰彼善於此則有之矣征者上伐下也敵國不相征也故知春秋者莫若孟子

程順

知詩古人能知詩者惟孟子為其以意逆志也夫詩人之志至平易不必為艱嶮求之今之艱嶮求詩則已喪其本心何由見詩人之志

張載

道德之言有有德之言有造道之言孟子言已志者有德之言也言聖人之事者造道之言也

明道

只言心子思言性而孟子只言心蓋性無所執所以惟



求之心心治則性得蓋心出於性故也如求放心養性  
存心盡心之類所以治心甚嚴不動心孟子所得謝諤  
責難於君齊宣王問王政孟子稱文王治岐滕文公問  
守國孟子稱太王居邠齊宣王好勇孟子稱文王武王  
一怒而安天下之民此責難於君也

范祖禹

言王道孟子對人君論事句句未嘗離仁此所謂王道  
也曰安得句句不離乎仁曰須是知一以貫之之理曰  
一以貫之仁足以貫之仁足以盡之否曰孟子固曰一

者何也仁也仁之用大矣

楊時

出乎富貴君子能輕富貴歟君子非能輕富貴也能出  
乎富貴也未有以出乎富貴而曰我輕富貴將以輕之  
適以重之夫惟出乎富貴者然後不為富貴之所誘何  
則此固有以破其誘也孟子曰生亦我所欲也義亦我  
所欲也二者不可得兼舍生而取義者也此孟子所以  
出乎富貴而立其表也且義之必取則生猶必舍也而  
不能舍富貴也耶

楊萬里

其中有守孟子之道始於至粗而極於至精充乎天地  
放乎四海而毫釐有所必計至寬而不可犯至密而不  
可察者此其中必有所守而後世或未之見也且孟子  
嘗有言矣人能充其無欲害人之心而仁不可勝用也  
人能充其無欲為穿窬之心而義不可勝用也士不可  
以言而言是以言餽之也可以言而不言是以不言餽  
之也是皆穿窬之類也惟其不為穿窬也而義至於不  
可勝用惟其不可以言而言可以言而不言也而其罪

遂至於穿窬故曰其道始於至粗而極於至精充乎天地放乎四海而毫釐有所必計嗚呼此其所以為孟子

歟  
蘇軾



羣書考索續集卷五十六